

四庫全書

集部

欽定四庫全書

文簡集卷十八

明 孫承恩 撰

五言排律

留別方伯劉公

先君子同年正德庚午歲

聖主敷皇極名臣重保釐
十年開泰運八葉際昌期
公也山川秀巍然柱石資
蕭何元應昂傳說又騎箕
德盛人規範才隆帝簡知
畢公終輔相方叔暫藩維
令出風

雷動恩行雨露滋百司遵約束多士仰光儀老手便繁
劇寵才大展施勞心雖惕勵退食每逶迤勲業今如此
台衡實在茲詎云追丙魏直可繼皋夔望重心逾下官
崇禮益卑故交雖久睽葑菲正無遺賤子慚庸劣窮居
歎蹇奇壯心空突兀末路竟差池鄙俗方嗤哂高情獨
獎推赤心真自托青眼匪公誰德較丘山重恩同鞠育
慈豈惟勤佩服直欲鏤肝脾未信終淪落還當策鈍疲
埋光羞匣劍脫穎志囊錐落落乾坤大悠悠歲月遲焉

能心快快祇是守規規自許當雄奮從來恥伏雌
酬恩尤有地報德豈無時行矣真難負天乎不可期願公多
福祉閱世享期頤搦管紆情愫當緘更忸怩莫能名大
德聊用識微私欲別心尤戀臨岐意獨悲西風吹去棹
翹首又天涯

登第後表謝釋菜日俱值雨有作

一滴春瓢雨知時集建章纔看飄禁籞又見濕宮牆雲
擁中天近烟浮碧水長皇仁應浩蕩聖德與汪洋襟佩

諸生肅簫韶九奏張恩波期共沐化雨故難忘葵藿心
偏耿羹牆意獨忙許身今日始稽首頌時康

送少傅劉老先生展墓歸

元老扶三聖台衡領百司山川鍾秀氣宇宙際昌期率
土瞻神觀中朝肅令儀文章呈黼黻藻鑑炳著龜任棟
材偏稱為珪玉不疵匡時心獨赤憂國鬢成絲一代經
綸著千年德業垂九重資說礪百辟守蕭規地望方隆
重松楸切孝私懇陳披悃悵歸去荷恩慈誥錫明廷命

黃焚秘閣辭光榮
覃梓里傳頌遍
耄倪謝事應多暇
懷高諒未宜乾坤
雙眼濶出處寸心
知霖雨蒼生望鹽
梅聖主思商山與
洛水莫久滯旌麾

送王司馬致政歸

八座聲華舊三朝
見老成際時依日
月接履上台衡聖
眷憐耆碩公心忌
滿盈累陳丹悃疏
去結赤松盟旭日
明騶從秋風引旂
旌天空紅葉下川
渺白雲平訪舊容
僧款尋幽帶鶴行
乾坤看晚節造化
與完名戀闕心猶

赤忘機夢自清汾陽初解組司馬暫辭榮出處隨舒卷
功名任重輕

喜雨奉郡伯喻惕菴

卧病連旬不能出門戶堂下無不肖之跡者
四閱月矣而屢沐垂問眷存殷至鄙衷感愧
何言日者憫旱禱雨而雨隨至公之愛民之
誠通於天矣不肖歸卧田廬躬耕待食而年
豐可望將實與田父野老同一忻忭輒課鄙

言十四韻奉見區區

兩月苦無雨郊原生白烟君侯重民隱軫念獨勤惓竊
笑焚巫妄惟師罪已賢精裡極昭格誠懇契幽玄小暝
驚俄爾濃雲忽沛然卧龍起深壑晴日暗居廬浙瀝初
堪數奔騰遂欲顛銀河橫迴望瀑布注高簷江鳥飛應
盡林花濕更妍黍禾青被隴畎澮綠盈川已慰三農望
寧無一物偏潛孚德政在闔闢化工全賤子三冬計東
原數畝田有懷同野老拭目待豐年

野舟詩

放浪非吾志烟波且自由雖知川可濟已與世無求
泛同江葦飄飄類野鷗行依漁艇亂靜內鶴汀收明月
蒹葭浦清風杜若洲笑歌天漠漠濯足水悠悠魚鳥供
詩興雲巒豁醉眸入天迷遠近逐浪泛沉浮倦後僦舫
卧狂來倚棹謳放懷真自得高興若堪傳逋叟西湖勝
龜蒙笠澤幽郎官謫仙醉赤壁老坡遊寧用如神技聊
齊泛海桴垂綸情亦稱擊楫事堪憂富貴非從好風波

任所投乾坤雙短棹身世一浮漚自是無拘礙誰能管
去留滄浪有餘興吾道儘優游

送祁通府入覲

旭日開新霽長風吹旆旌天空紅葉落江濶白雲平玉
帛君臣禮扳留父老情詩歌南浦綠棹拂晚山青驛路
分吳甸河山接帝京人瞻千里月鶴共一天清勲業看
前哲才猷範後生九重方側席好去立虞廷

觀奕

空堂手談誰剥啄驚戶外旁觀似予閒當局真敵對勢
多楚漢強地割鴻溝界斂拓互闔闢錯縱明向背攻圍
盛行陣隱伏妙機械竒出風雨交冥搜鬼神會爭雄不
相能奪雋詎容貸時移方一着妙處得三昧坡云方優
游我欲無勝敗疾呼為太狂潁顏亦頗隘一挫何須餒
斂枰還可再茲藝豈猶賢飽食聖所戒

晚宜樓

結構幽棲處江天欲暮時翠屏看更好虛閣坐偏宜霞

映千峰亂潮隨一棹移橫空翻暝色絕島起孤吹倦鳥
投林速歸雲到峽遲喜看羣動息覺與衆緣遺忽忽浮
生事悠悠千古思且將娛晚興聊復撫吟髭勝事君多
會高情我最知愧非陶謝手細寫入新詩

送沈立齋赴吉安博士

振鐸看君去離筵惜袂分人才重江右名譽擅休文秋
夜聽山雨春風採澗芹草玄揚子寂傳業鄭生勤聖世
寧遺士旌書會出羣未應虛歲月遲子有奇聞

寄壽大宗伯汪石潭先生

天上風雲會人間福履優尚書踐台斗學士下瀛洲聖
井神光合靈山瑞靄浮高閣張壽域華降集清秋曲度
南飛鶴年標北海籌達觀欣失馬靜慮不驚鷗歲月雙
蓬鬢丹青萬卷樓登高謝安屐訪舊剡溪舟薄海瞻全
節中朝仰令猷九重優老典行矣貢林丘

送金硯江赴東光文學

金子吾邦秀名馳已廿春珠光雖不掩鵬翼未全伸少

試魁倫輩雄名聳搢紳昭昭視霄漢落落且風塵幸不
名稱濁寧嫌廩祿貧漢廷重文學魯士籍陶鈞畿甸聲
聞近清銜樂事真絃歌依日月夢寐切星辰業紹毛公
遠儒宗董子醇應無題鳳客會有問奇人莫易羈懷動
須教意氣振天寧終困士世亦自儒珍彈劍思疇昔持
杯悵此晨勉旃身未老終擬樹嶙峋

三石聯芳詩

西蜀席氏三伯仲俱擅高才里人夢有石浮

江而下有文曰三石聯芳既而三伯仲俱以
高科登顯仕為三石之應仲氏虛山學士索

予賦此詩

宇宙生奇異山川產俊良地靈自今昔神貺兆禎祥巴
蜀雄南紀蠡叢肇啟疆岷峨橫井鬼黑水奠雍梁大藥
餘丹乳奇環錯瑤璜秀鍾端有在物產詎能當席氏聲
華舊高門慶澤長遭逢宜必偉朕兆固非常沕穆誰尸
宰精神接杳茫江波浩吞吐星月澹蒼涼有石乘濤下

中流勢欲颺馮夷來獻瑞川后迴舒光鬼斧鐫神篆龍
宮發秘藏烟雲動姿色蛟鰐避文章誤是君平識疑堪
舜廟將斷經遺漢代深刻類岐陽鼎屈神鼇負漂流弱
葦揚將無逾析木直欲渡銀潢一氣潛昭感三辰競耀
芒玄冥安測究徵驗匪荒唐已見連翩起都將次第償
嶙峋增氣象濤瀨藉輝煌並立雲霄上高擎日月傍程
材作金礪効用柱明堂疑補蒼生漏期跨碧海梁會須
齊華泰千古鎮巖廊

寶應湖風濤之險贈同舟三君子

解纜風威盛揚帆暝色生湖波昏浩渺星月慘光精
蕩漾中流險喧呼半夜驚入船跳急雨跋浪偃長鯨惶惑
同舟侶艱難共此情病夫興盥櫛舟子乞神明河渚依
微見蒲叢漸次橫未須論近遠暫得免煩縈慎重應無
悔濡初合用銘朝來同慰喜相與記茲行

少湖見懷有詩用韻奉酬

江海蹉跎客風塵塞拙人未辭簪紱累終擬菊松隣淺

薄承嘉會幽閒稱病身聊將慎出處敢謂異羣倫有美
詞林彥無瑕廊廟珍明時徵鳳鳥絕代見麒麟化雨覃
江介清風洒俗塵文山人仰岱學海士知津遠荷金聲
贈常懷玉樹親矢心期佩服此志敢教淪

蔡林屋考績北上別予以詩用韻答二首

傾蓋名聞舊談文媿老成才高推鼎甲心莽得夷庚意
趣卑流俗門牆列俊英草玄甘爾寂好德見吾衡考績
官評著還山逸興生野猿迎主熟湖月印心明話別增

離索貽詩荷悃誠迂疎慙造次珍重此時情

學道曾論志蹉跎竟寡成浮雲觀世變逝水嘆年庚不
擬裁朝菌還期採夕英迂忠懷袞補繆拙濫文衡麗澤
高賢與分襟別恨生君方敦雅道世復際文明款接多
慵廢酬知但朴誠緇衣吾敢負猶為跂高情

登毗盧閣

峻閣壓巔岼閒來一倚欄飛甍懸裊裊曲磴鬱盤盤海
嶽同標勝義娥互轉丸望窮孤鳥沒神爽朔風寒似絕

千尋上上聲真將萬里看波濤涌空翠緯象宿簷端披豁

塵寰隔攀緣佛界寬慈雲翔寶地王氣滿長安淨理因
超悟玄心契妙觀諸天疑出現一氣俯瀾漫自得真濛
趣都忘陟降難依稀見吳會鄉思欲飛翰

讀石江中丞因成堂記賦二十四韻

海宇開熙運旬宣屬老臣賦才元傑出為政必殊倫已
見訐謨密兼承大製新圖回方懇懇敷繹故諄諄宏議
宗謨訓高詞軼漢秦豈惟書力役實以寓經綸軻籍稱

平政義經紀勞民務三知體要畫一示規循總總言都
異肫肫意獨真持衡應比石察隱動如神疏滌源無滯
調停理故因欲將甦槁朽咸與沐陽春且識心多瘁毋
云力易陳乾坤方鞅掌時事重艱辛杼軸民財困東南
國賦頻儲胥資妙筭懷保藉深仁周悉憂民念勤渠報
主身會看功日峻終擬道全伸天為生賢佐時方仰大
鈞願言依袞宸跂足上星辰久矣欽明德難哉踵後塵
具瞻方赫赫雅度但恂恂末俗堪誰語迂衷竊自珍祗

將言作頌敢謂業相親

次雙岩司馬亭谿少宰夜酌聯句韻

官理無休暇良宵共此筵地當深巷阻候屬一陽前款
語方諧洽披襟各粲然爐薰芝閣煖燈晃錦袍鮮霜月
繁窓細寒花照几妍未窺風雅窟試續孟韓篇倚玉才
難並耽吟興頗偏冥搜超象外角勝得奇聯壯擬戈揮
日狂思劍倚天文章悲世代聲價仰前賢翼亮須羣彥
甄陶屬大銓塵勞方鞅掌雅會合留連星宿蕭何履風

雲祖逖鞭羣征時正泰端揆任彌專白髮催予老青山
結舊緣病駒懷戀戀威鳳故翩翩浮世看皆幻虛名祇
用傳有懷慙竊祿無術解延年興盡歸驂動詩成彩筆
懸何時擬重會把醖賦雲烟

和雙岩雪月賞菊之什

寒夜大雪霰冰山鬱嵯峨登堂欣有會對菊可無歌狎
恰三人共聯翩五字哦差池胥會少感慨繫時多韓孟
才非敵曹劉興不過高城聞擊柝深巷息鳴珂放浪予

誠罪撝謙公謂何疏絃餘古調勁質靡柔柯鵬鶚橫霄
漢驂騑騶澗坡豈惟抒悃素直用發天和縱語言無擇
論心誼不頗焉能甘齷齪祇是守波波共擬心扶日難
教手障河襟期忝同趣才力竟殊科病骨思丹換衰顏
得酒醺莫教夸父日空憶魯陽戈魏老非嫵媚陶翁且
婆娑但令樽有醕莫計雀堪羅要使常披豁而誰事唯
阿相期崇令德永誦白圭磨

借韻述懷

垂老寡懽趣孤懷尚嵯峨朝吟梁甫操暮聽濯纓歌意
豁掀髯笑詩成把酒哦關心時事切入夢故山多德業
蹉跎廢光陰遞續過朋簪嗟異處朝署喜聯珂未死終
難已無聞可奈何但令車有輔寧患斧無柯幸際明良
會叨登鸞鳳坡媿將聲土缶濫擬厠雲和密勿欽韓范
邊陲仗牧煩願言勤策勵寧敢惜奔波愁疊千重嶂腸
縈九曲河此生浮泡幻塵迹轉蓬科祇益頭顱雪無由
笑臉醺感恩思隕涕報國欲橫戈宇宙分多事才賢盛

那娑

猶言如許也

好將忠作報不負禮為羅擬玉期無缺為

鋼欲靡阿詎應甘汨沒槁壤共沉磨

擬萬壽無疆詞次韻

五位嚴宸地十官魏闕前秋高澄霽色空半起爐烟於
穆瞻龍袞鈞韶協鳳絃百蠻熙禹甸八極仰堯天義肅
乾坤正仁覃品物妍愚臣勤頌禱聖壽萬斯年

夏日水殿納涼應制次韻

爽氣浮蕙薰風泛芰荷晴開天滉漾石甃碧嵯峨翠

仗千官從芳朝萬乘過瑤宮聊駐輦水殿忝聯珂帝道
惟清淨皇襟順太和寧須周室筵欣戴舜絃歌華拱生
靈籟飛烟隱女蘿恍疑雲出竇不見襪凌波自慶三辰
豫才慙五字哦空傳晉河朔似奉名卷阿願得清陰普
從知惠澤多對時垂拱治萬載保山河

擬從幸玉霄公主山庄詩次王摩詰韻

迤邐春明遠風光入望賒從聞仙子宅自出帝王家臨
幸勞天步鮮醴暢物華迴環浮碧落傑構接飛霞漫說

銀河泛虛聞博望槎樓翔秦女鳳地產葛仙砂北闕宗
瞻近南山落照斜不因時省俗亦或訪桑麻主貴應誰
擬宸遊數未涯何須千里駿自有七香車

擬奉和幸三會寺應制次宋之問韻

勝日宸遊處因過禮覺仙瑤壇騰法雨寶地肅香泉鶴
舞如迎駕猿來慣聽禪縱觀欣湧塔普度肅諸天化國
羣生仰鑾輿萬衆懸言旋宮月上正照紫城圓

送司成龔雲岡赴南都

宮諭龔子擢南司成例有贈言偶觀介翁集

有為龔子壽太夫人詩借韻一首

甲第聲名重朝廷寵渥頻人文開泰運宇宙際昌辰帶
綰金魚麗袍裁錦雀新即看風軌地原是廟廊珍多士
沾時雨賢僚契德隣鹽梅須鼎輔風采切朝紳雅志希
前哲休光絕後塵陶鎔資大治禮樂範斯人共仰師模
盛隨看帝命申高崗鳴彩鳳瀚海躍神鱗將毋瞻黃道
承懽侍錦茵北堂娛永日南國慶長春惜別情何極論

交意獨嘖佇聞徵召下翹首大江濱

送許少華中丞十六韻

漢室推賢日周畿仗鉞辰謀謨裨廟略懷夾沛皇仁已
見流亡甚兼虞寇盜頻旬宣催命急拔擢拜恩新許子
真竒傑高才迴絕倫人稱今法從我識舊儒珍制閫心
同石飛章筆有神行空看驥足跋浪偃鯨鱗天設關河
險時須保障臣百僚資彈壓四牧重咨詢造士絃歌動
臨戎鼓角振詩哦每橫槊局對或留賓令與風霆迅恩

將雨露均端期蘇槁朽不獨靜烟塵慷慨匡時志勤劬
報主身即看勛業地圖畫照麒麟

使郢出京九卿諸公餞別報國寺

玉節清冥下羣公祖帳同雲烟開霽色臺殿肅秋風即
奉嚴禋裏須知聖孝崇驪歌邀落日劍氣拂明虹倚席
懷高誼持觴激懦衷皇華慙莫稱何以詔顓蒙

石涇中丞携酒夜過

倒屣中丞至燒燈綺席開朔風疎檻竹寒月淨琴臺漢

水波濤偃山城鴻鴈哀我多懷土念公擅濟時才雲樹
頻年夢壺觴此日陪通家非一日二十五年來

飲童內方宮詹宅因留別

闕下從分袂湖南共此筵冰霜看晚節松竹倚晴天古
復文風暢名門世澤延不應龍久卧佇見鳳孤騫密勿
經綸侍乾坤翊戴全雷陳多契誼王貢合聯翩屢拜高
文贈深承獎與偏才雖媿邾魯臭或比蘭荃雅會懽無
那王程興已邁相期無限量執手大江邊

和戴龍山丁祭十二韻

殷祭宵當午良辰日在丁生民匪吾道長夢竟誰醒陞
遣溫綸重筵鋪黍稷馨肅雍昭禮樂於穆儼神靈宇宙
資元化刪脩正大經聾聞徹雷電昧昧識丹青木鐸疑
狗座絃歌或近屏馳神勞仰極想像魄中扃道與乾坤
並恩當肺腑銘登天悲伎倆志學惜年齡瀚海將探蠡
洪鐘擬舉筵禮成餘敬在翹首立宮庭

少傅夏桂翁六十壽詩

聖世開熙運昌朝得大賢河圖呈瑞旦崧嶽降神年月光華盛風雲慶會駢遭逢原有數軒豁固無前鳳矯翔千仞鵬騫隘八埏對時方育物熙載廼旋乾登陟三台峻調和二氣平弘樞資密勿大治荷陶甄徵角招相悅鹽梅用乃宣眷隆錫馬日任重負鰲肩游刃分羣鶻孤峯障百川令儀欽穆穆雅德見淵淵懇款抒長策從容握化權陽春功泯迹時雨澤無偏學術三才貫詞鋒八面專經綸徵事業風雅寓詩篇翼翼匡文德雍雍和

舜絃人傳白雪句家有紫霞編榜揭蛟龍蒼岩鑄星斗
懸全才元不器盛美總能全望重心愈下功高志益虔
即今黃閣老原是玉堂仙火宿輝南極台光燭昴躔遐
方瞻氣象朝士樂周旋纔見三元始重占六甲圓環中
神獨至鏡裡髮常玄平格從天壽冲虛象帝先松喬行
可致鍾鼎故哀然靜養探玄理冥心契道詮百祥來止
止一氣亘綿綿皇祚無窮紀貞休幸共延小詩追吉甫
奕世擬流傳

寄徐長谷三十八韻

徐子真英特之官山水鄉聊將經濟手暫屈簿書忙憶
昔鄉掄秀稱才爾擅場敷言稱賈董作賦陋班揚天樞
看騷裏人間覩鳳凰霜蹄初展步雲翼滯高翔職為親
民喜情於好爵忘一方淹國士百里見星郎別我關山
去經年桃李芳傳聞多慰羨施設不尋常訪俗心應下
緣儒政乃減疲農思德化昭代出循良造士絃歌動威
奸紀法張教遵周禮樂人誦漢文章日霽高原黍風清

沃野桑循行時露冕翁稚或褰裳拂劍春星落彈琴山
月涼槐庭閒引鶴芸閣靜焚香吏治原非俗高情合得
償地從侈名勝家復迤封疆覽秀天門上探奇雪竇旁
縣中二山名詩成宜刻竹興到或飛觴報政行超最抒懷尚
激昂世途多感慨吾道屬行藏清廟須珪璧工師擇豫
章即看徵汲黯未必老馮唐問訊鱗鴻杳睽違歲月長
臨風遙灑翰佇立望蒼茫

荒壠小會吳石湖有詩次答

春晚多陰曠茲晨霽景開荒原完小構雅會稱深杯詠

述慙無范

范成大
有詠壽藏詩

堂闕敢望裴君恩全賜賚先業勉

規恢愛容思投轄呼兒更洗罍莫教歡易擲應念老相
催續述堪誰畀松楸重自哀膝前五孫侍身後幾人培
有地還移竹無心漫植槐烝嘗聊稱矣耕讀亦宜哉骸
骨終長託行歌歲幾迴百年天地裡感嘆若為裁

石湖用前韻紀興再次答

老境多愁思朝來懷抱開漫遊偕勝侶樂飲怕停杯散

性惟希白高踪曷擬裴祗看時齷齪寧見量恢恢我自
飽為竿誰家玉作壘雅懷須盡日僕子莫教催杳杳終
天恨淒淒滿目哀貽謀那遠料積善乃深培美植惟梧
櫟深陰勝棘槐懷賢何及矣撫世亦悠哉瓶罄思回棹
詩哦不計迴諸公盡才彥拙句懶刪裁

謝張明崖大中丞招飲

大府崇文會清秋啟盛筵幸當離亂後樂觀治平年已
蜀雄藩服峨眉產俊賢九重專簡命列郡仰旬宣討伐

乾坤正綏懷雨露偏山川回氣色瀚海息風烟井邑原
無恙耄覲獲保全農家秋晚刈僧寺日高眠舒慘先王
治張弛事理然衣冠欣盛集雲物麗高天疎竹臨軒翠幽
花對客妍思迴搶攘際興洽笑談前磊落行籌筭舍容
富簡編詞壇曾力騖藝苑更精研盛德敷遺遠仁人繼
述先平生想風采此日共周旋勛業今如許台鉉望已
專詎惟詩詠頌佇看鼎彝鐫念往吁嗟久懷朋涕泗漣
孝思情罔極推愛意良虔食報猶徐也昭施必大焉老

夫如健在奕世看騰鳶

再疊前韻答明崖見和

夙有詩魔癖今叨文會筵無聞慙往歲垂老憫流年憂
世懸微悃匡時合讓賢姁姁誰則是意氣竟何宣自分
疎慵廢其如質性偏玄機難測識世故浩雲烟都憲經
綸密明時翊戴全憐予多老病下榻稱高眠消長推天
道懽娛順自然寸心徵白日拙守託蒼天喬木需時用
丹葵向日妍搗謙形迹外放浪酒樽前愛士勤三接劬

書覽百編保釐心獨至丹墨手親研高步茲為盛哀庸
愧率先風流雅傳播事業劃迴旋繫遯吾何敢舍章子
自專謳歌今日事鍾鼎後人鐫野老歌黃鵠詩人詠碧
漣雅情真挹損鄙志亦勤虔啟助良多矣才情實歎焉
無能攀逸翹翹首仰高騫

城居贈任海村

我厭城中寓出門即囂塵雅情難適散矮屋莫舒伸昔
自罹憂日時當避難晨雖求淳厚里竟寡素心人擇處

違前訓安居欲近仁德惟慙淺薄化未浹比隣伏膺慙
酬與深藏但襲珍紛華非夙好屠賈豈吾倫酒熟無朱
共詩成乏阮論摧頽惟老子風月伴閒身吾子差強意
冲襟雅任真面交難許故知契不嫌新江館深秋色金
風吹白蘋相望路無幾顧我莫嫌頻

閒居寫懷

七十稀從古吾生隘五年不緣脩攝致頗藉藥功全感
激君恩重優游老景延風塵過夢裡意興託樽前穹壤

蘧廬似義娥轉轂然行藏今皓首心事只青天愛竹多
留筍澆花曲引泉幽齋無俗事時詠遠遊篇

憶舊居二十韻

我憶舊居好依城亦半村敦龐通鄙落汗漫接平原潮
汐交流滙濠梁拱翊尊途迂渺冠蓋地靜遠塵喧
蕭蕭菑畬合深深花竹繁樓高延皓月窓豁近朝暾背水開
精舍誅茅搆小軒山僧時造席野老日過門散適東西
陌將迎三兩孫携筇登隴首把釣坐槐根興倦時支枕

朋來共倒樽潛魚觀泳躍好鳥看飛騫雅意娛松菊閒
情戀鶴猿叶差同元亮宅敢謂辟疆園自昔懸車也怡
情賴此焉優游延日月倏忽幾寒暄祗擬詒謀遠寧知
邁數屯變生非意料禍烈半燒燔先世經營志今皇賜
惠恩自慙都上負那得免煩冤玄理無來復天心有默
存興衰誰與問俯仰信乾坤

文簡集卷十八

欽定四庫全書

文簡集卷十九

明 孫承恩 撰

五言絕句

園居漫興 三十首

花竹映幽齋
柴扉背水開
主人緣謝客
終日沒人來

又

屋後萬株花
垂楊拂岸斜
野人遙指認
望見是儂家

又

雨後苔階滑朝來杖策行未應輕踏破愛此色青青

又

樹底通幽徑花闌亦逶迤柔條未經縛棘刺亂鈎衣

又

端居息衆喧靜坐澹百慮坐久不知夕斜陽在高樹

又

嘉木交簷翠新梢拂檻青一雙魚虎子飛近竹窓鳴

又

潮來水平堤潮退水根出何常修下牢常使溪水溢

又

溪頭一朝雨水長三尺餘若教更終日俯檻拾遊魚

又

高原獨鶴下遠渚孤雲飛會意不可寫涼風吹葛衣

又

虛亭萬竹中亭午日色薄風寂不聞聲時聞落新籜

又

春筍無拘管橫堦只漫生似知主人意故欲斷人行

又

霏霰朝來雨旋添菜甲肥隣翁亦真率覓取到柴扉

又

朱果累累熟園開細細香摘來得甘美先奉老親嘗

又

果熟山禽伺園扉早未開兒童解珍惜拾取半殘來

又

晨興閤殘編開窓曙光入忽有野人過隔溪笑相揖

又

小白分無數迎潮作隊遊凭欄可垂釣急為辦綸鉤

又

竹几匡牀穩幽軒更洒然小窓明月下來伴道人眠

又

莫謂吾橋小曾經失足來從教修葺好穩步任蒼苔

又

野笋無料理惟宜賤子食若教都作竹約畧百來竿

又

推窗送遠目依依煙樹開白雲拖片影飛過北村來

又

散髮高雙屐清宵步月明水中有潛魚應知吾履聲

又

茂葉團陰密繁枝結實低獨行時自摘分食到童兒

又

開園覓時蔬稚子笑而語摘來經幾朝今朝摘盈筐

又

啟戶涼風入看雲稱穩眠晝長人語靜高柳數聲蟬

又

瓠白茄子青軟美勝梁肉百年腐儒餐飫飽堪鼓腹

又

小鳥相過熟巢棲蔚薈中恐令驚却去不敢語兒童

又

楚客千畦蕙儂家二畝蔬草根隨意長無事欲親鋤

又

無事朝慵起今朝步月中呼兒抱甕出汲水灌花叢

又

風動竹林響渾疑作雨聲老夫憂旱切日日聽鳩鳴

又

閩詩一首

題雜畫冊葉八首

白露橫江面涼颼起林樾孤唱無與酬垂綸釣明月

又

清夜不能寐獨酌松樹下風吹頭上巾月落手中筆

又

寂寥春山空靜坐消萬慮搔首望青天白雲自來去

又

雲出山頂合雲歸洞口封地深人不到白日下雙龍

又

月出大江口乾坤一釣船
洞簫聲起處驚醒老龍眠

又

習靜山中處孤吟絕往還
曉煙收盡處坐見隔江山

又

臚臚川原合依依桑柘疎
柳汀與花塢好是輞川居

又

山頭出白雲瀑布灑飛雨
可人期不來目斷瀟湘浦

西湖十景冊為唐飭軒題

湖光映層甍朝來晴可漁時有冶遊人隔花呼買魚

右漁莊鳴榔

虛閣極蕭爽菡萏搖清漪坐來不知暑香霧濕人衣

右曲院風荷

日入湖上昏鯨音破寥閒遙知諸僧定爐薰坐禪寂

右竺寺曉鐘

幽花照寒泉秋光翠欲滴扁舟彼何人遙遙渡空碧

右野菊寒泉

夕陽沒晴空倒影在石壁長歌歸去來依依遠山碧

右雷峰晚照

南高何巍巍北高何巉巉登臨人跡稀白雲時往還

右雙峰插漢

湖山澹空濛堤上行人少欲渡心忉忉浩歌水雲渺

右斷橋烟雨

日出烟霏開湖上散清霽采采芙蓉花懷人渺何處

右延祥清曉

琳宮鎖春寂斜日蕩孤舟歸鴻正嘹唳離思滿滄洲

右蘆汀歸鴈

團團白玉盤飛出千峰頂山中有幽人長廊步清影

右千峰夜月

再題西湖十景為湯宜野作

晴洲映花柳春水生蘼蕪朝來漁舟集網得松江鱸

又

蓮塘浸虛閣香風吹綠雲何處採蓮者聞歌不見人

又

山寺鬱岩堯鐘聲幾暮朝流光百年內俱向此中消

又

野寺秋容靜幽人逸興多漫邀彭澤叟來和濯纓歌

又

夕陽明遠山萬疊橫紫翠扁舟早歸來飄蕭起孤吹

又

兩峰高入雲特立競蕭爽何當挾飛仙遨遊任來往

又

密雨濃連靄湖山卷畫中有人倚虛幌孤酌對溟濛

又

旭日波光動精藍曙色開美人多逸興吹笛過湖來

又

天際征鴻杳湖邊幽趣多綵舟移曲渚醉殺綠煙波

又

月明萬山靜
灝氣浮空濛
翛然無塵界
湧出青蓮宮

月下溪邊露坐

白露何蒼蒼
波光正渺茫
懷人成獨坐
離思共流長

送陳德弘省母還常熟二首

朔風吹京塵
白日忽以晚
高堂違定省
遊子情黯黯

又

束書戒晨征
別我在頃刻
把袂不得留
使我心惻惻

題便面二首

秋氣日已佳野色清且虛小亭塵不到讀盡人間書

又

雨過羣山開清風來樹頂妙趣知者誰默坐發深省

題壽星

一杖扶元化乾坤自始終本來無面目偶落此圖中

三笑圖

道合混希夷得意俱了了相看本無愁一笑山水香

橫山八景

奎壁兩文星化作吳中石千古煥人文精英射天碧

右雙華峰

小逕亦徂來綠雲鬱紛紆幽人時縱步拾得青珊瑚

右萬松逕

盤陀白雲根常作白雲主何如任飛去從龍沛霖雨

右留雲石

澄波涵皓魄驪珠漾空明幽人夜吹笛應有蛟龍聽

右浸月池

江連雲氣合海近旭光侵不是春能佳林巒深更深

右藏春塢

景物雜前陳應接每不及居然此亭中一齊盡收拾

右集勝亭

昔聞軒墀寵今見裂土食禽荒雖有戒不與幽人事

右俸鶴田

分得劍溪春種向仙人家但供玉川渴不學君謨奢

右藝茶圃

題小畫六首

林壑起涼簾空翠洒飛雨坐此山中秋忘却世間暑

又

暮靄忽蒼然前山日將落扁舟早歸來湖上風色惡

又

峭壁插青障浮雲湧雪濤悠然對終日興與雲山高

又

朝伐木丁丁暮伐木丁丁一擔歸去晚帶月煮參苓

又

宇宙本無涯浮生良可嗟
憧憧亦何事吾正讀南華

又

芳洲多菰蒲水深生烟霧
漁舟亂鳴榔驚起沙頭鷺

又題小畫

清風吹竹林夕陽墮西塢
相逢且停竿共此話今古

題墨竹

嶰谷春深候新梢落粉香
鷓鴣烟雨裡瀟灑墨雲涼

使交舟中雜詩

籬落數家村藤蘿掛夕曛兒童驚鼓吹喧笑入柴門

又

逆流如跛鼈順流若飄蓬人心若無厭猶自數呼風

又

春水綠漣漪春山響畫眉汀洲有芳草隨意詠江蘼

又

山斷村居出江空郡郭浮夕陽鳴鼓吹候吏立沙頭

又

宿雨山光濕微風水面平今朝客意好江上快春晴

又

山水饒幽興篇章亦漫裁只將消永日不是倚多才

遣興十首

偶讀山谷老色日上面歡悰日去心一詩憮然有感予年四十餘矣習懶荒廢德業日益不振兼多病隱憂落寞憔悴漸失往時意興

山谷似為予作者因用二句為韻各賦一絕

清霜點明鏡玄髮漸以縞百事一無成駸駸忽將老

又

心事日已多歲月日已逼況此抱病軀焉得好顏色

又

一朝復一朝光陰苦超忽安得萬丈繩繫此西飛日

又

中夜不能寐展轉獨淒愴誰與百憂期種種來枕上

又

世途何巖巖物情知時變玄穹默無言浩嘆時仰面

又

今朝胡不樂忽忽來無端但見有可嗟不見有可歡

又

人心各有念時念恒不同安得素心人共此談幽悰

又

青春何堂堂去我忽若失試以古稀言來日少去日

又

憂來紛無踪浩若烟霧聚又如春生草屢剪不可去

又

人事等泡幻金石亦消沉頽仰百年中感慨傷人心

又

頃讀山谷詩有感作十絕句既又念達人委
命志士固窮必潦倒自廢出無聊語則幾不
智矣故復反之十絕以自慰解

一歲無常春一日不常早人生會當然豈得永不老

又

桃李多艷姿松栢有勁質君看烈士腸寧羨兒女色

又

焚香坐蒲團神定心更逸坡翁有嘉言一日便兩日

又

翩翩何翩翩對景亦酣暢恨不如蝶蜂飛在花枝上

又

長日澹無事晴窓獨披卷幸窺古人心勝接古人面

又

無諂志自伸寡慕心迺寬有酒復有書適矣能不歡

又

披襟當明月拂軫彈清風於茲更弗怡何處是懽悰

又

男兒貴成名千載猶特立摧頽一無長百歲但一日

又

幽花明曲欄流鶯在高樹解襟且銜杯一掃俗塵去

又

日月常照耀天地自崇深何哉兒女愁得上烈士心

題雜畫冊

乾坤有此亭澹寂似太古我欲往從之江空渺難度

又

春雨晚冥冥烟梢洗更清鮫人過淇澳拾得鳳凰翎

又

脈脈凝清露芳姿濕更勻憑誰持快剪溪上剪紅雲

又

落日陂塘靜秋風倚敗荷平生急難意回首欲如何

又

烟柳碧穆穆泥融燕子酣斷腸春色好無處似江南

石洞中畫梅

小洞羅浮似孤根倚壁斜夜深明月下疑是雪中花

題畫為許松皋賦四首

煙柳綠穠穠桃紅着雨酣春風遲步履幽意滿江南

又

空山夜寂聞蘿月挂岩頭凭欄發清嘯松風吹滿樓

又

落日沉大堤湖上歸舟少遙遙望村居浩歌水雲渺

又

空山歲云暮寒雪積深谷中有避世人長鑱斲黃獨

題畫冊一十二首

朔雪暗郊原溪橋行不得
不聞鳥雀喧惟聽折松竹

又

長松落空翠風至起簫笙
道人無別事終日誦黃庭

又

仙境非人世雲山終古青
夜來春雨足斲得松根苓

又

落日策蹇驢西風吹葛衣
征鴻起江渚一一背人飛

又

寒雪斷人踪
千山無鳥聲
扁舟欲何適
莫是剡溪行

又

罨畫溪山似扁舟
出柳陰水風浮
淡爽涼月照虛襟

又

塵世無閒人
青山有剩地
相對不言語
祇話山中事

又

山浮草閣幽
竹影落清泚
愛此潺潺聲
塵襟淨如洗

又

碧樹障紅塵山亭多白雲清談欣有伴送酒可無人

又

山深秋氣佳衡門鎖虛寂扁舟載酒過時有問奇客

又

茆屋依山構沿村路不遙酒旗標野店有客過溪橋

又

雲裏古寺深寒威凜毛髮寒驢踏山逕不憚溪橋滑

贈張鶴仙四首

胎仙本清貞立性亦高塞溪邊日優游不知歲華晚

又

鶴本千年壽醫功可長生會當乘天風飛飛返瑤京

又

步屨春風裡有鶴時相從逍遙溪上人似是浮丘翁

又

幽人寡俗務日涉清溪隈行侍無奚奴自有胎仙陪

題崔少卿八詠卷

誰將曲江春移置君家園先公有遺澤勉旃期接武

又

喬柯挺蒼玉繁英簇紅裊喧寂各有時莫嫌不逢春

又

秋菊有佳色浥露何鮮新我思彭澤翁清風古猶今

又

此君亦可人真姿傲霜雪比德匪玩物相看敦晚節

又

壁立古鐵色巉巉我獨拜乾坤鍾英靈千古鎮長在

又

空明比中局有本何源源蘭亭脩禊事邈矣羲之賢

又

窈窕徂徠陰閱此胎仙舞千載鮑明遠莫信司空侮

香山寺泉亭

斜陽照石壁寒泉浸松影風生萬籟虛鶴唳千山靜

淮河舟中四首

終日憶家愁
愁看淮水流
我今方此去
何日是回頭

又

淮水日南逝
吾行正北舟
欲將雙眼淚
寄向淮中流

又

北望路雖遙
出門亦已遠
慙慙囑淮流
為寄愁心返

又

寄聲淮水去
歸思共滔滔
吾家何所認
門前雙石橋

題小景畫冊十首

頃有數小石家僮疊而為山且陶人物編屋
宇植草木以擬山間景象頗有幽致宋石門
折而圖之因各紀二十字

拉伴事幽尋古洞共探厯馬蹄相追隨嵐氣襲衣濕

又

有石倚空曠拔地何巉然緩帶一瞻眺興落飛雲邊

又

曖曖夕陽沉林壑倏已暝樵牧各歸來銀蟾上松頂

又

亂石倚巉巖山徑故崎嶇肩輿度前岡松風吹我衣

又

浮圖屹亭亭乘暇一俯仰忽然風雨來簷鈴一齊響

又

濯足復濯足還以洗我心浩歌滄浪吟千古有餘音

又

蹇驢駛一老行過松逕尋詩應幾章寒露滴衣冷

又

旭日上瞳矐何人有瞻拜我愛陽德升萬古永不晦

又

澄湖浸雲天有亭湖之涘凭欄發清嘯魚龍或驚起

又

山深無塵俗山翁嗜玄虛解琴時一鼓引出溪中魚

六言絕句

便面

雨收碧樹猶濕雲載青山欲浮欸乃一聲何處夕陽江
上歸舟

突兀半空青嶂依稀遠浦漁船人在翠微深處鳥飛烟
雨溪邊


人住桃花源裡舟橫獨柳溪傍狼籍濕雲片片幽間鳬
鳥雙雙

題畫二首

楊柳烟橫谷口桃花水漲溪頭有客尋真無路滿地白

雲自流

碧山四圍無路岩頭瀑布長鳴半點紅塵不到中有高人耦耕



文簡集卷十九

欽定四庫全書

集部

文簡集卷二十一

詳校官中書_臣葉元符

中書_臣劉源溥覆勘

總校官原任中允_臣王燕緒

校對官修撰_臣戴衢亨

謄錄監生_臣唐作梅

欽定四庫全書

文簡集卷二十

明 孫承恩 撰

七言古詩

題公子醉歸圖

長安道上秋日晴城頭月出人不行
雕鞍寶馬曼胡纓
貴遊諸郎總豪俊錦衣繡帶爭鮮明
歸來似是較獵餘
醉酣酩酊態度舒垂鞭緩轡無疾驅
武夫健卒前執爰

牽黃臂蒼左右趨蘭房盼倚如花姝銀缸照耀紅氍毹
彈絲品竹吹笙竽爭妍競麗為主娛甲第高門競華侈
快意平生惟有是少長寧知稼穡艱歲月都忘老將至
人生幾何同泡渥從渠富貴死即休石崇漫遺金谷恨
鄧通空負銅山羞若教聲名等滅沒西山餓夫實癡物

送友人應繡夫還四明

朔風蕭蕭黃葉飛河梁送客歌驪駒子今別我遠行邁
我獨戀子心依依青天浩浩雲靈靈吳山高高水茫茫

離愁黯黯不可寫澹煙寒日孤帆張子行不可留執手
且延竚丈夫所志在功名區區離別何足計方今聖人
急圖治網羅英俊無遺棄子才人中龍利比干將器我
亦無慚逐後塵駑駘未可同騏驎年光冉冉如流波及
時樹立當嵯峨行哉贈子言勉矣毋蹉跎

南齋十詠

南齋主人求詠十舊物既原其意各賦四十
字雖不甚工而主人之意則頗見焉然鄙意

尚有未盡者再賦此十章

白魚豈是瞿聃朋
茂劣仁義戕羣經
我方涵詠含醇英
似爾蟲賊吾當膺
攘除呵護叱六丁
吾欲與此同死生

清宵短焰光陸離
幽窻伴我伊吾時
論功較德真故知
棄置豈似秋蒲葵
紛紛世態良可嗤
斯言有感韓昌黎

焦桐遺製亦神奇
古音雅澹存依稀
琅然一曲夜何其
霜清月白風淒淒
繁絃急管方趨時
吁嗟若人莫可知

昆吾夜作饑龍吼
匣裏寒光射牛斗
神物不隨塵土朽

魑魅遁迹魍魎走會乘風雷排戶牖興雲作雨澤九有

古人妙墨今人收古人心畫誰能求不知閱世幾春秋
人間萬事良悠悠斷文尤足當琳球吾欲即此窮冥搜

百金曾儲古畫圖意像彷彿超有無懸知歲久成模糊
愛之我欲重為摹留情一物我亦誣誰為此論眉山蘇

剡曲霜藤出新款側理羅紋明玉版幾向晴窗獨舒卷
影落水池錦雲暖何當廣置三千簡繪地摹天專紀纂

分得仙家烏玉玦紫霧玄雲電光掣非方非員孰剡缺

尚爾么麼未磨滅翰林揮詞此薜蘿潤色皇猷補天裂
歛山山頭雲電馳鬼工琢石出幽竒割為玄硯余得之
四方相逐昌余辭豈子鈍壽不足稽泰山溜石重嗟咨
當年曾獻明光宮至今猶襲中書封詞林奏捷無前鋒
時哉一去悲秋風豪來一揮尤可供摩挲疑是蟠蛟龍

送張君歸延安

并序

吾鄉楊伯玉先生以直道去國其謫于延安
也得人有張君者數以忠言贊不逮洎先生

擢守

闕

州取道歸寧張君復侍先生行留吾

松數日而去嗚呼去古既遠友道日乖而況
于相臨勢分其情尤踈彼其諂諛求合以售
其私則有矣孰能如張君之無所利而忠告
者耶視去任之上官如過客則有矣孰能如
張君之不忍於別而千里相從耶張君庶幾
古之義士矣因其行賦此為餞

子瞻昔南謫萬里一孤臣符生抱忠義朝夕來相親男

兒七尺軀欲為知己許從來燕趙足豪傑未必今人不
如古張君亦義士意氣誰得如使君直道寡交合獨許
子也相嬉娛空谷聞足音重得使君惜豈無箴規助新
政亦有慇懃慰岑寂一朝使君歸千里仍追從驅車發
蒲坂鼓楫遊吳東昔隨使君來今隨使君返防身一短
劍迢迢白雲遠吳山亭亭水增波蕭蕭落木西風多重
君高誼惜君別為君慷慨發浩歌

留別蕭山李廷宣

生平重交誼意氣橫九州浩蕩四方志湖山遠近多遨
遊茲晨來錢塘歲云暮矣風颼颼扁舟亂江濤訪舊假
此數日留感君一見即傾蓋登堂肅我雅意何綢繆賢
哉伯仲並溫茂把臂一笑使我明雙眸雕盤出細膾小
甕開新筍劇談豪飲終夜不知倦浮以大白澆我磊塊
之離愁北窻一榻亦瀟灑荷茲禮意誠兼周高懷曠度
出庸俗令我感媿欲報嗟無由君才亦超越文綵驚凡
流皎然明月珠爛矣珊瑚鉤行將獻閭闔致身寧許終

林丘我生年來亦三黜銳志未肯言包羞暫失東隅未
為恥奇功何待桑榆收昆吾笑把太行倚彎弓掛向扶
桑頭丈夫自負貴挺特誰能與俗同沉浮乾坤分內事
慷慨無匹儔礧然孤鳳鳴要令百鳥慙喧啾顧君亦可
人吾言誇矣當無尤相歡不久會有別萍蓬踪跡良悠
悠念君厚矣無所贈題詩欲比雙琳球浮生歲月不可
待勉矣德業追前修來年我去訪春色望君來共登瀛
洲

觀競渡歌

城中千門懸艾虎汨羅江頭沸簫鼓此時競渡人聚觀
躡足駢肩似環堵輕舟利楫江之湄長風獵獵吹紅旗
糾徒選侶分黨與一心各欲爭神奇擊節揚枹競爭進
萬楫齊飛不容瞬岸傍觀者為助呼拔幟期誰先得雋
幹波擘水噴瓊瑰羣龍躍出銀山堆兒郎棹歌聲愈厲
聞聞鼓急喧如雷賈勇爭先誰肯待壯士銜枚期奏凱
急驚奪得錦標呈千人萬人齊喝采須臾競罷各停舟

酬勞更復刳羊牛龍舟出水倚屋舟留取來歲還嬉遊
嗟吁此曹真戲劇快美傍觀亦何益莫言爾技真有神
江水無情不汝識

王梅翁從祀文山祠紀事

宋家南渡國運傾中原擾攘多憑陵海嶽震蕩天地否
日月慘淡無光晶承平養賢三百祀厚澤深仁浹心髓
負國忘君間有之忠義相望不勝紀文山先生世偉人
堂堂節槩摩蒼昊一時幕府盛賓友英賢契合從如雲

就中王子更奇傑慷慨平生慕忠烈義骨原鎚百鍊鋼
丹衷獨藏三斗血文山起奮勤王師天命已去誰能支
北風吹折藻旌旆倉皇文相遭囚羈傷心再覩田橫客
意氣凜凜填胸臆風塵瀕洞不自保嶺海間關死無益
君臣師友義莫酬北望慟哭煙雲愁生事死祭兩不忤
氣激雷電江河流竭來宇宙知幾年炳炳遺跡星日懸
文山之祠高北斗一堂配食還諸賢論世當時孰遺失
介推不與從君績王子芳名自難泯有識固為斯文惜

文孫自是忠孝傳表章先德應拳拳獨勒長疏獻天子
一朝俎豆增其間巍巍廟貌回生姿寒泉蘋藻興遐思
綱常允繫豈漫爾顯晦有數須明時霸業雄圖寧久賴
天理人心鎮常在因觀盛事激予衷為賦長歌一寄慨
元夜有作寄友人

今夕何夕光景濃帝城和氣蓬瀛中六街燈照千門曉
銀花火樹搖春風春風淡蕩春如許遠近兒童聞笑語
好香應自麗人來翠袖羅幃共飄舉羅幃翠袖見驚鴻

兩兩三三踏軟紅更有王孫公子過金鞍玉勒聲玲瓏
院落笙歌齊鬪巧風光共惜今宵好香風吹散隔簾雲
夜深猶把金樽倒玉堂先生東海人年年旅食京華春
寂寞殘燈照枯坐吟詩思苦偏傷神長歌短歌空激烈
玉漏沉沉猶未歇短衣乘興過君居攜手中庭踏明月

觀玉河洗馬

玉河新漲波融融圉人沐馬當晴融左手執刷右執籠
人意似與馬語通權奇盡是天閑駢駟驪駘駘各不同

臨流意態何從容欲涉未涉心忡忡淋漓濺沫無奔衝
剪拂垢穢披氍毹房星墮落漢河中蜿蜒戲躍如遊龍
五花文錦雲濛濛風髭霧鬣俱蒙茸初疑遠涉東溟東
又疑馳自崑崙峯拳拳毛灑汗霞流紅雪貌玄兔生崆峒
銀鞍玉勒光照瞳被來骨相增奇雄驕嘶昂首生長風
矜持顧影羞駑驂時清戰息無邊烽天家飼秣芻豆豐
安閑不似周王驄驅馳海上俱龍鍾

七夕

商飈振庭柯大火以流西

是日立秋

烏鵲填橋渡銀漢又是

雙星會合時茲事古傳言茫昧理莫據承訛踵繆益附
會天孫錫巧人間世駢羅餐餌瓜果新兒祈女拜紛成
羣柳州之柳忝學道亦自喋喋鳴酸辛吾聞隆古時大
道靡巧拙元氣既以鑿奸偽乃百出殫力竭知日益工
更欲乞取將何終我意天孫心豈不為世恫無由挽回
古淳朴尚肯錫與滋民凶塗塞民聰明知巧併黜息太
樸庶可還民德不戕賊我自大拙世莫倫從吾聊用全

吾真再巧再拙徒漫云草堂幽幽當此辰且對明月揮
清尊

硯江歌

為金汝馨賦

此江不出岷山源乃在金子陶泓方寸間一泓泠泠貯
微涓斂之不盈杯沛之浩渺瀾大千無體象兮無津涎
會四溟兮通百川靜深有本其出變化恍莫測滾滾何
啻萬斛泉激為波濤吞吐澎湃自震蕩舒為淪漪潺湲
演迤相迴旋流風蒸雷滄雨霧鯨擲鼇抃魚龍舞疏鑿

非因神禹功氣勢不假陽侯怒狂馳撼即墨餘潤濡管
城呼吸萬彙搜精英金子擅之成大名望洋愧我心膽
驚淵然蒼然不可以正視不敢涯涘矧敢爭偉哉江兮
吾欲藉爾溉八寅潤九土俯沿後世仰遡前古蕩滌宇
宙穢洗濯日月昏上昭至德光下雪生民寃三靈盡朗
徹六合無垢氛功與元氣侔萬古流渾渾

貞鴈篇

里人為予言有雙鴈宿蘆澤中虞人獲其一

貨之里中士人家愛而畜之於庭其一亦飛
至與俱若無人焉悲鳴徹日夜宛轉呌號詰
晨俱死予感其事紀以詩

雙鴈從何來翔集蘆渚中雌雄兩婉妮鳴聲諧嗃嗃西
風蕭蕭月慘慘虞人舉網當夜半網得其一即貨之剪
鍛羽翼留庭隈雄耶雌耶逸者誰飛飛隨來鳴聲悲屋
角盤旋朝復暝上下哀呼兩相應天高地下空斷腸日
落風淒弔孤影孤影無奈何下地來與俱見似不見人

自甘送微軀引脰宛轉鳴若泣若訴別噉噉中夜聲弗
休朝來視之交頸絕雲天杳杳雙魂征幸免一魂悲弗
平此鴈此鴈義且貞惟欲同死不獨生我觀人夫婦生
各申婉孌一朝大故及炎炎志中變從一寧知不二天
但為新人巧粧炫末俗紛紛物不如聽我慷慨歌貞鴈
題百鳥朝鳳圖

吾聞羽蟲三百六十鳳為君貴實以德不以文天生神
異冠衆鳥體統亦似明卑尊邊生畫鳥鳥真似大小纖

濃妙俱至人間久不觀鳳凰此圖信美將無是但見威儀肅雍羽翩躚蹈履矩度如折旋體具衆像明可識凡羽固知難髣髴梧岡旭日初瞳矐乃有百鳥紛來集孔鸞備文章采色亦璀璨鷺鳥雄俊姿特立偉顧盼老鶴高亮鷗鷺清鴻鵠遠志雉介貞其餘種類總各異舍生毓氣紛縱橫或趨而承或拱而翊引脰戢羽無驕矜俛仰宛如望顏色吾聞上古有道鳳出遊管領衆鳥儀虞周尋常羽毛世不乏欲覩此鳳將何由鳳鳥不出世愈

下乃獨令人看圖畫

牧牛詞

郊原一雨餘煙草柔更綠田家兒約伴騎牛趁晴牧風
日和煦坡隴平徐徐且弗驅之行烏犍既飽還復卧夕
陽倒射牛背明老孖顧犢每却立犢子喜躍時一鳴安
閒了無齷齪態物意順適如人情古槐陰陰如厦屋兒
亦槐根閣雙足莫言飼牛多辛苦一飽已矣無庸心牛
飽兒欲饑有餉不勞翁嫗攜暝色沉沉迷遠樹短笛橫

吹却歸去

苦雨

七月八月雨浸淫黯黯經旬愁太陰
今朝忽然雨如瀉
烈風冥冥翻屋瓦巨靈倒捲天河傾
狂風疾奔橫四野
洪濤崔嵬如山立陂塘溪湖水皆溢
舟航高拂屋簷過
魚鼈低從籬罅入平原沮洳高岸崩
徒杠墊没人不行
上田下田莽為浸何論町畦并溝塍
是時田禾方吐花
根株飄蕩沉泥沙不見黃雲搖穰稭
但見白浪喧羣蛙

老翁晝哭夜嘆息婦女稚子無人色不愁朝夕救死生
祇恐官司租賦迫租賦迫奈何空將鞭朴催會須蠲除
活百姓日望天邊恩詔來

賀侯少府生子

侯少府生子且暮矣索余補湯餅詩草草塞
責末句聊用為戲當一笑也

嘗讀老杜徐卿二子詩彷彿親見二子奇公家有子更
奇特我才非杜將何為秋風泠泠剪雙桐神如玉樹隣

清風試看骨相有如此定知不與常人同只今周暮已
卓異穎悟偏能了人意迎人作禮如成人我有豚兒却
增愧吾聞仁者後必昌此兒異日誰能量生子墮地四
方志假以數歲應騰驤徐卿之詩空自好名位當時竟
無考我詩雖拙宜有徵若比前人當壓倒君欲乞我湯
餅歌謗才無奈強吟哦我欲乞君補湯餅君也須當一
笑領

夜歸

溪風蕭蕭吹我衣
溪頭小舟寅夜歸
一聲兩聲山犬吠
八點九點明星稀
颯颯孤篷忽聞雨
岸上明燈有人語
奚奴敲門暗中立
老僕出來然兩炬

孤鶴行

沈子贈我此孤鶴
長頸脩脩瘦軀閣
羽翼摧傷色慘阻
野性似不堪羈縛
向人驚擲猶未馴
掩抑知渠意非樂
時窺隻影立清沼
應有遐心思碧落
整翼欲舞還復休
引頸將鳴更中却
竹下羞同燕雀羣
日長獨向莓苔啄

老夫平生甚愛此顧玩時時不嫌數焚香鼓琴日與儔
主如老夫亦不惡我家園亭白日靜水石幽森儼林壑
塵囂紛華不汝干似此豈不堪棲託老夫惜汝亦良至
汝獨漠然無領畧羅罽懸空萬里悲鸞鳳似有三山約
風塵擾羽毛短雲霄陰陰天路邈遲爾三年長養成
任子去去翔寥廓

後孤鶴行

我從前月失孤鶴草堂獨居誰與娛園林豈無百鳥弄

好語喧啾聒耳增煩紆朝來驚看怪事出有物忽向吾
園集野性不愁繒繳傷風毛猶帶煙霞濕海波微茫天
宇高蓬山方壺雲路遙九華仙人知我索寞遣汝至不
然我亦何計能尋招意態閑雅步卓犖俛仰不驚時飲
啄棲息亦或同鷄鶩仙俗終難混清濁整翼不忘雲外
心晏然時復揚清音夕陽起復山鳥散午夜一聲溪月
沉寒蘿翠竹搖森爽階下何當紫芝長不須華侈羨文
軒只用吟哦愜清賞山家歲月朝復朝吾欲與子申久

要慎無一旦棄我復飛去使我草堂仍寂寥

悼鶴

孤鶴自向吾園居顧步飲啄慘不舒息多清陰食有魚
我獨無以為爾娛長日悲鳴懷舊侶天濶雲深飛不去
一日誰教羽翼殘經年誤爾樊籠住朝來園丁走報予
鶴也忽斃驚嗟吁燒琴瘞石總成戲前輩風流尚堪記
恨不葬爾首陽下清節無慙逸民似乾坤俯仰成古今
赤壁磯頭月色陰眼中無復婆娑影耳畔猶聞警露音

遂令草堂失幽致從此老夫乖賞心

題畫壽李明府

華亭李邑侯七月一日為初度庠友薛時芳
自述雅沐侯愛以此畫乞予詩壽侯碌碌久
未有復侯茲以獻績北上時芳復來言乃為
此作兼致贈別意

薛生手持畫一幅向我言稱乞珠玉鄙人卧病三月餘
為子開圖醒雙目層巒疊嶂高嵯峨翠栢蒼松間修竹

白雲為扉霞作屏桂棟蘭橑敞華屋堂中主人儼冠佩
時有賓從趨僮僕行行有客何事者奉桃實兮牽蒼鹿
不是尋幽問字人欲向堂中讚純福我觀此圖起忻嘆
子也殷勤意何屬生言李侯嶽降辰敢以區區效芹曝
侯有德政稱循良持身況復冰霜肅古言仁者天所祐
遐社於侯更何卜矧侯英邁方壯年茲意雖厚將無瀆
侯才自是當大用百里暫屈驛騶足只今奏最趨明光
應有殊勛動當軸丈夫得位志大行匪為崇卑較榮辱

侯當峻陟弘厥施勉效前修繼芳躅歲聿云暮風雪盛行矣陽和散暄燠詩成矯首天茫茫極目雲霄看鴻鵠

秋雨嘆

海城秋深風雨急天地黯慘魚龍蟄我欲出門道沾濕獨坐空齋百憂集去年久雨禾盡傷今年秋霖還作殃白日不照天目盲悵望涕淚悲穹蒼

喜晴

秋來合沓多玄陰只疑白日終幽沉今朝欸然覩奇事

銅鈺爛爛懸青林如饑得餐病得愈鳥亦為歌蝶為舞
少乾沮洳天廓清老夫便向東郊行

向晚雨益甚

朝來喜晴農自嗟共說雨意還無涯老夫聞言疑且怪
豈有悖謬如此耶雲陰漸濃日光薄殘雨疎疎仍放脚
不知黯靄從何來頃刻瀾漫遍寥廓入室愁坐空悲歌
吾農吾農將奈何

顧靜虛求錄舊作

抱病一秋情索寞筆硯詩篇久零落
顧子愛我情不薄
為出此卷書舊作倒篋出筭費搜檢
漫錄數篇謝勤確
下筆欹傾覺生溢掩卷沉吟硯頻涸
迂疎半是野人語
放浪潦倒疇予若顧子茲事愛成癖
辭翰每問名人索
東江三汀並絕妙兩雄相當靡勑弱
顧我曹滕廁齊魯
君也誤愛予慙忤美玉明珠問頑璞
慎勿並視彰穢惡

登桐山

桐山嵯峨屹孤峯下瞰江水當奔衝
我來攝衣凌絕頂

飄飄兩袖乘長風懷仙頗憶桐仙翁桐仙一去幾經載
猶有像設留遺踪道人考擊晨昏鐘深淵不怕驚魚龍
風送搖搖渡江去城中兒女酣睡方濛濛煙光微茫淡
秋容潦水落盡寒潭空全浙江山吾目中乾坤浩蕩開
心胷夕陽渺渺隨征鴻白雲飛來如我從何當乘之遊
海上去看日出扶桑紅

擬題忠節祠次韵

漳江百里東北馳瞰江突兀開新祠大書雄扁照日星

內有血染忠臣姿何物么麼亂天紀風塵瀕洞須臾起
低頭不作彥回生嚼舌甘為杲卿死義聲一日震九州
乾坤慘淡煙雲愁勁氣欲褫鬼蜮魄赤手要截長河流
紛紛共作餘生保一死翻嗤公草草無水江中洗穢羞
有客祠前奠蘋藻伊誰筆如金石堅狂歌為我磨崖鐫
頰首拜公淚迸泉綱常招揭垂千年

擬題滕王閣次韵

秋日江邊訪高閣停橈幾向洲前泊時移世變那復見

漫記滕王昔年作憶昔滕王遊宴時鳴璫振羽何瑰奇
山風泠泠動豪吹浦雲冉冉度哀絲四時亦有邦人共
里市招搖盛賓從治理都忘侯度艱玩愒惟將賞心縱
豪華已矣不必論遺蹟空有文章存鼓鐘考擊老氏殿
魚龍嘯舞江濤門盛衰常數豈惟此萬事風花無不爾
舟人捩舵且復行長嘯一聲渺煙水

飲呂仙亭醉賦

呂仙亭前林木幽呂仙去名空留呂仙時乘黃鶴遊

中宵劍氣橫清秋
世間萬事如浮漚
乾坤千古悠悠
先生少年歌遠遊
齷齪富貴隘九州
俗緣擾擾何時休
一盃喚子應掉頭
攜我去去崑崙丘

題七星岩

北斗星精墮平壤
融結胚渾競森爽
神鎬鬼鑿擬營構
窈窕谿谷更虛敞
元氣潤濕煙霞重
白日慘澹含悲風
異勝時應集仙侶
幽深更訝蟠蛟龍
蒼翠緣崖蘚浮纈
題刻前朝半明滅
不愁陰森侵骨肌
抱枕期來卧雲月

送李海樓之襄陽歌

襄陽江水揚洪波襄陽之山高嵯峨跨荆引蜀控南北
地重物蕃當險扼名邦作牧須俊賢吾松李侯無與肩
刑書三千浩雲煙侯也一一能精研况侯壯年才力富
心地炯炯涵秋露致身金紫非偶然千里騁駟見高步
小施大受理則優恢恢眼底無金牛退食自公多暇豫
不妨弔古還尋幽卧龍岡上秋雲冷墮淚碑前芳草暝
鹿門月色自古今習池風光誰管領羊葛勛名傳不誣

期侯將來名與俱若過習池就試問還有高人龐孟無

送郭使君赴太原節推

吾聞燕趙出豪俊郭子才氣何瑰奇鵬鷖翔翔整風翮
騏驎騰踏開霜蹄除書小試還佐郡輶車遙遙指三晉
讀書讀律一以貫盤錯恢恢有餘刃問君聽獄何所同
冰壺一片懸心胸民俗簡朴矧易治依稀乃有陶唐風
桑乾河邊冰已泮春明門外日色爛青鬢紅顏照錦袍
道上行人誰不羨新知義氣情不無何以贈子雙昆吾

臨風忼慨浩歌起期子與政傳京都

題華山圖壽楊邃翁

噫噓嘻華山之高五千仞兮崢嶸突兀摩蒼穹渾沌融
結自太古平地崛起開鴻濛擎天屹一柱倚日排三峯
神劍鬼鑿何玲瓏自天墮下青芙蓉丹崖翠壁競森竦
洞穴滲澹生雷風氣吞衡岱如相雄俯視衆鎮真叢叢
金精運元化橐籥多神功磅礴蜿蜒孕靈秀生賢亦與
嵩山同石淙先生王佐姿手握經濟藏珠璣降生實與

申甫類漫詫應昂并騎箕生于滇南長湖南江南有公
亦增輝我公固非一國士三南要為天下奇憶從髫年
膺剡薦雲間驚驚人間見夜月觀書白玉堂春風獻賦
黃金殿摘毫揮帝制雲漢分天章公于爾時歐與蘇金
薤玉露垂琳琅名藩寄旬宣菁莪育多士公于爾時程
與朱正學千年賴增氣南北容臺掌帝祠人謂我公夔
與夷昭回制作等前古禮明樂備崇丕基玉塞宣威雄
屏翰人謂我公韓與范小試胷中十萬兵要以鞭笞折

驕悍西府尊嚴統六師典司邦政專戎機公也曾居畢
公任坐令萬國嬉清時柱石明堂位元宰一德忠貞篤
亮采公今方作商阿衡表正百官均四海公生本自岳
降神盛大又與山同尊詩家比興竊取義頌公還擬山
嶙峋乾坤有喬岳宇宙有耆碩我公未許尋常肩茲山
寧與他山匹君不見山之氣兮束鬱噴洩無由平散為
靈光接太清我公盛大出必異賸有如前事業昭休聲
為流分九河為雨遍八極我公忠勩在三朝端螭肖翹

沾德澤雲霞結紫蓋草木含春榮我公文章本天賦呈
祥吐瑞揚華英窈窕中空洞可望不可測公量亦宜然
容受靡有擇巉岩倚絕壁可仰不可援公操固如斯特
立誰能干盤據中天壓后土運為之功了無覩鎮定天
下泯聲色公有陰功亦誰數華山之高兮公實與陪生
絹一幅開崔嵬山耶公耶兩莫辨但見渾樸老氣橫絕
直上連三台天眷英賢宜壽耆海宇黎民正翹首區區
頌禱吾能言惟願公與茲山兮百年千載同長久

紫泉行贈階守張子

吾聞秦川武都有紫泉不與他水同淵源紫泉有泥色
歲歲澄瑩甘滑葡萄鮮漢家璽書出明光紫泥醺筆芝
蘭香淋漓天葩雲霧濕迴旋錦軸龍鸞翔明王御下恩
數異寵德嘉功詎能幾頗聞巖穴徵遺賢半為民庸獎
循吏張子磊落多俊稱一麾出守秦川行閱城下武
功在犀牛社中香火明是州良牧不數人五代王孫特
有聞一時褒詔衆所羨千年故事誰能湮

漢王弘有
詔褒美

丈

夫致身當及早後輩前賢可同調書生豈無韜畧用顛
連正須恩澤保紫泥紫泥空復云別有徵書鳳銜到

題張院使仁齋行樂像

神僊風骨不易摹茲圖洵美非凡夫仁齋張子儼肖貌
被服古雅仙之徒張子素業岐黃書精粗一貫無遺餘
治心繕性極玄理土苴濟人乃能事京華聲聞三十年
醫功到處人爭傳上保皇躬荷恩寵致身金紫非徒然
張子行年今六十壯容髮烏未班白不是從來調攝功

形神似此那能得深秋雲物肅以清盤礴睥睨雙眸明
似是自公值休暇神安氣定無怔營以術壽人已亦壽
况有陰功獲天祐異人名世代不無我當補傳倉公後
苦熱行

此日亭午暑毒劇火雲如旗映天赤杲杲白日照厚地
地皮盡作龜背坼萬生嗷嗷困曝炙洪爐大冶烟焰赫
赤帝司權祝融助風伯雨師皆屏息眼見焦草木還聞
爍金石我有寶劍百金直只愁此時融作液鯢鯨蛟龍

徙窟宅下歸北海波濤黑林鳥戢羽獸深匿我獨何之
坐蝸室朝來忍饑漸過盱雖有美饌何能喫散髮赤脚
露兩肘蔑禮自愧難巾烏人生脆薄本不堪況是老夫
衰病逼有此酷烈相煎熬豈得元氣不消蝕我聞太華
之西崑崙北四時常陰雪霰積陰風淒淒慘寒栗安得
此身插兩翼一至其地消煩疾

後苦熱行

昨日苦熱欲發狂袒跣大叫無遯藏火雲照夜星耀芒

今日不可更禁當低垂鬱蒸氣如結肌膚屢搔成痂瘡
蘄竹八尺琉璃光欲眠先看汗流漿炎熇蘊隆遮日黃
松枝栢葉凝不動長筴勤揮那得涼四時平分乃恒理
陰陽二氣翕以張千古萬古胡不爾豈獨此日為予殃
情隨事變弗自覺憂喜苦樂態失常翻思沍寒凍欲僵
恨不置身火與湯

與吳石湖

吳子閉門讀書常浹旬草堂蕭然無俗氛靜觀物理欣

有得邈以富貴真浮雲
巷東巷西寡相見我亦抱病出門倦
知君不廢筆硯功寄我新詩月數遍
風雅道喪成浸淫吾欲與子鈎其深
會當盡去雕虫習學和康衢擊壤吟

為郭判府題蟠桃圖

憑誰染此蟠桃圖
崢嶸老幹屈鐵柯
上有鸛鶴來翩跹
下有碧水揚層波
吾聞此桃之實大如盞
圖中纍纍頗
彷彿暈臉含春低壓枝
新梢拂露和雲長如船之藕真

足誇更聞棗大還如瓜世有此藕復此棗豈不有桃如
此耶漢時王母親傳賜方朔三偷自堪紀玄都觀中難
比倫武陵天台乃其似郭侯自是忠孝人拍拍滿腔生
意真曾向河陽種千樹散作氤氲萬戶春只今又值懸
弧辰桃花海上蒸紅雲雲間之種種特異結實不以千
年論况君正當壯年力萬里雲霄頭尚黑一年一度餐
桃實歲歲年年誰算得春風浩蕩春陽和美人一笑朱
顏酡壽筵未譜南飛曲展圖先賦蟠桃歌

憂旱

去年曾賦苦雨歌感時託興憂思多今年正復苦無雨
耿耿此念憂何如此時春深農務促村北村南鳴布穀
錢鏹都勤耕耨功有待甘霖齊發育三月不雨四月來
草木猶自含枯荑山頭不見片雲出郊原遠近飛黃埃
村中迎神競簫鼓南海誰教牛鬻土童子空歌蜥蜴神
中路不見商羊舞青天白日駕晴虹雲師雨伯俱無功
誰能上天訴屏翳不然入水鞭蛟龍盡道今年魑為祟

無望秋成登樂歲皇天德澤久不下知是蒼茫有奸戾
吾聞洪範推庶徵休咎類應久杳冥唐虞殷周稱至治
天道人事相因仍吾皇聖神御宸極亮采羣工盡明翼
一德格天天所享七政何宜有愆忒苦多苦少恒不均
誰使造物還平分廟堂調燮豈敢議無乃昭示多非真
只今潢池肆攘竊殺氣縱橫日流血十萬王師轉戰勤
饋餉經年尤未歇驅逐風塵及犬雞遠近失業多流離
征輸未實太倉粟要待一飽甦瘡痍天禍吾民未容解

灾毒頻仍若相待哀哉吾民亦何辜便欲乘風叩真宰
九天高高去無緣要以人事回蒼天遇灾修德乃明哲
請誦周宣雲漢篇天人交通亦甚邇悔禍應看沛甘雨
一犁既足槁朽蘇萬里還看甲兵洗觸事憂時百感侵
無能碌碌只長吟杞人我亦真堪笑何處悠悠語此心

文簡集卷二十